

M'sia mahu pertingkatkan lagi hubungan akrab dengan China - Najib
Astro Awani
Okt 30, 2016

KUALA LUMPUR: Perdana Menteri Datuk Seri Najib Tun Razak mahu pertingkatkan lagi hubungan akrab yang sedia terjalin antara Malaysia dan China dalam lawatannya ke republik itu bermula esok.

Najib berkata lawatan rasmi selama enam hari beliau ke China bukan sahaja akan meningkatkan lagi kerjasama dalam bidang dua hala malah juga dalam isu-isu serantau dan antarabangsa.

"Tahun lepas, jumlah perdagangan Malaysia dengan Republik Rakyat China meningkat sebanyak RM23.09 bilion dan China terus menjadi rakan perdagangan terbesar Malaysia sejak 2009," katanya dalam catatan terbaru di akaun Facebook dan Twitter beliau.

Najib pertama kali melakukan lawatan rasmi ke China pada 2009 manakala lawatan kedua pada 2014 bersempena ulang tahun ke-40 hubungan diplomatik antara Malaysia dan China.

Lawatan terbaru perdana menteri ke China adalah pada Mac tahun lepas bagi melakukan lawatan kerja untuk menghadiri Forum Boao bagi Asia (BFA) di Hainan.

Pada lawatan kali ini, Najib akan diiringi isterinya Datin Seri Rosmah Mansor, Perutusan Khas Perdana Menteri di China Tan Sri Ong Ka Ting serta beberapa menteri kabinet termasuk Menteri Luar Datuk Seri Anifah Aman, Menteri Pengangkutan Datuk Seri Liow Tiong Lai dan Menteri Perusahaan Perladangan dan Komoditi Datuk Seri Mah Siew Kiong.

Menteri lain turut serta dalam rombongan perdana menteri ialah Menteri Perdagangan Antarabangsa dan Industri Datuk Seri Mustapa Mohamed, Menteri di Jabatan Perdana Menteri Datuk Abdul Rahman Dahlan, Menteri Pertanian dan Industri Asas Tani Datuk Seri Ahmad Shabery Cheek, Menteri Pendidikan Datuk Seri Mahdzir Khalid dan Menteri Pelancongan Datuk Seri Mohamed Nazri Abdul Aziz.

Pada lawatan itu, Najib antara lain dijadual menyaksikan pemeteraian lebih 10 perjanjian dan memorandum persefahaman (MoU) antara kedua-dua kerajaan dalam sektor pertahanan, ekonomi, pertanian, pendidikan, kewangan dan pembinaan.

Selain itu, syarikat Malaysia dan China juga akan menandatangani lebih 10 perjanjian termasuk pelaburan dalam pembinaan pelabuhan, paip gas dan loji penyulingan air, e-perdagangan, pengeluaran panel solar, pembinaan, pelaburan, pembangunan dan kewangan. – BERNAMA

Tag: [Najib razak](#), [lawatan rasmi](#), [China](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/msia-mahu-pertingkatkan-lagi-hubungan-akrab-dengan-china-najib-120992>